

O PROJEKTU

Projekat „Let's Do It – očistimo zemlju za 1 dan” je posvećen rješavanju problema ilegalnih deponija smeća. Implementacija tog projekta podrazumijeva različite projektne aktivnosti u smislu da nudi edukativne, medijske, aktivističke, umjetničke i druge programe u cilju unapređenja životne sredine u Bosni i Hercegovini i promovisanja ekologije i volonterstva. Glavnu aktivnost projekta predstavlja velika volonterska akcija čišćenja kada će se sinhronizovano u jednom danu pristupiti čišćenju ilegalnih deponija smeća i zelenih površina na teritoriji čitave Bosne i Hercegovine. Ideja za projekat je proizašla iz saznanja da u Bosni i Hercegovini postoji veliki broj divljih deponija, a njihov broj se procjenjuje i do 10.000, te da njihovo postojanje ima izuzetno negativan uticaj na životnu sredinu i zdravlje ljudi.

Po uzoru na Estoniju i Sloveniju koje su prve organizovale i uspješno sprovele takvu akciju (Estonci 2008. godine sa učešćem od preko 50.000 volontera, a 2010. godine Slovenci sa učešćem od 270.000 volontera), ovu aktivnost pod nazivom "Let's Do It World 2012” je 2012. godine uspješno provelo 96 zemalja u svijetu. S ciljem davanja podrške globalnoj inicijativi čišćenja planete, Udruženje građana "Ruke" iz Sarajeva je organizovalo akciju na nivou Bosne i Hercegovine pod nazivom „Let's Do It – očistimo zemlju za 1 dan“. Akcija se sprovela u saradnji sa Udruženjem građana „Mozaik prijateljstva“ iz Banja Luke, u partnerstvu sa vladinim sektorom, javnim i privatnim privrednim subjektima, školama/fakultetima i drugim nevladinim organizacijama i udruženjima, kao i uz podršku međunarodne zajednice, akademske zajednice, javnih i privatnih medija (elektronskih i printanih), te uglednih osoba iz javne društvene i poslovne sfere života. Akcija čišćenja je održana 9. septembra 2012. godine u 105 općina širom Bosne i Hercegovine. U akciji je učestvovalo 37.554 volontera i iz prirodnog okruženja je uklonjeno 5.500 tona smeća.

Nakon uspješno organizovane akcije i uspostavljene funkcionalne mreže vladinog i nevladinog sektora, lokalnih timova, medija i drugih, UG “Ruke” i UG “Mozaik prijateljstva” su odlučili da „Let's Do It“ akcija u Bosni i Hercegovini postane tradicionalna i sprovodi se svake godine. Za 2013. godinu, volonterska akcija “Let's Do It – očistimo zemlju za 1 dan” se planira organizovati 18. maja 2013. godine, pa su shodno tome pripreme na organizaciji volonterske akcije čišćenja za 2013. godinu već počele.

CILJEVI AKCIJE

Osnovni cilj projekta je doprinijeti poboljšanju životne sredine u Bosni i Hercegovini kroz uklanjanje ilegalnih deponija smeća, čišćenje zelenih površina, zaštićenih područja i drugih prirodnih vrijednosti, što će doprinijeti smanjenju zagađenja i povećanju svijesti građana o zaštiti životne sredine.

Projektom su definirani konkretni ciljevi koji će biti ostvarivi pažljivo isplaniranim i implementiranim aktivnostima projekta:

- ✓ Obezbjediti učešće najmanje 100.000 volontera koji će učestvovati u akciji čišćenja.
- ✓ Stvoriti upotpunjeni registar svih ilegalnih deponija smeća za područje Bosne i Hercegovine. Registar će uključivati podatke o broju, specifičnostima i lokacijama pojedinih „divljih“ deponija smeća.
- ✓ Ukloniti iz prirodnog okruženja najmanje 20.000 tona smeća.
- ✓ Podići svijest i edukovati javnost o zaštiti životne sredine putem mnogobrojnih projektnih aktivnosti koje su usmjerene ka educiranju građanstva kroz ekološko-edukativne programe, medijske kampanje, okrugle stolove, promocije i druge aktivnosti.